

Augsburg, 17. August 1567

An Johannes Oporinus

UB Basel, Fr. Gr. I 11, fol. 298r.  
Steinmann Nr. 787.

S. Andreas Iociscus Silesius Grienebergensis, et à Xylandro et ab alijs mihi commendatus, cum hic spe sua, nescio quas (!) excidisset, et Basileae typographis operam nauare decreuisset: me rogauit, vt se tibi commendarem. Quod etsi minimè necessarium esse puto, quod suapte doctrina et virtute (nisi fallor) ipse tibi se commendabit: tamen, si quid in eum officij mea quoque causa (quod sine molestia et incommodo tuo fiat) contuleris: mihi rem gratam feceris. Vedit is lucubrationes meas ita paratas, vt tibi in mora futurae non sint. Sed quia mihi diffido, et cui fidam habeo neminem: non molestè laturum esse te existimo, si commentariolos meos Officiorum, te in nondinis occupato, denuo relegero. Mittentur ad te Basileam prima quaque occasione. Sed quia rarò se illa mihi offert, te quoque illam quaerere velim. Reliqui libelli, vt Cato, Laelius, Paradoxa, Somnium, antequam tu Officia inchoaueris, absoluenter, vti spero. Gnomologiae Isocraticae conuersio latina 12 paginarum mihi restat, et relegendi, emendandi et locupletandi labor. Describendi autem et in locos certos digerendi occupatio diu me detinebit, si me in scholijs Demosthenicis hac hieme laborare volueris. Caepi equidem, et Olynthiacas confeci, vt licuit. Sed si caetera et laborem eundem, et temporis tantundem postularent, in medio cursu ne conciderem, esset metuendum. Sed spero Deum affore meis conatibus, cum in recognitionibus meorum operum, praeter officium, et commodum tuum, et studiosae adolescentiae, nihil spectem. Neque enim me gloriola mouet, multo permista veneno, et eiusmodi praemia sunt, quae mihi caereos non persoluant. Curabo tamen, quantum in me fuerit, vt primum tomum Demosthenis graecolatinum non multò post Cal[endas] Ianuarias accipias. Scholia mature sequentur. De Isocraticis meis nugis quid fiat, non tam mea causa, quām quod D. Crato nouam praefationem et dedicationem Caesaris nomine flagitat, scire cupio. Verum nihil est quod quicquam hac de causa de tuo instituto mutes. πάρεργα γὰρ ταῦτα. Vale, Mi D. Oporine, et D. Zwingero et Cantero multam salutem. Augustae 1567. Augusti 17.

Hiero[nymus] Wolfius  
Tuus.